

AKASHVANI (AIR)
RNU : KOLKATA
Bengali Text Bulletin

Date: 30.09.2024

Time: 7.50 P.M

বিশেষ বিশেষ খবর –

১) আর জি করের ঘটনায় সুপ্রিম কোর্টে স্বতঃপ্রণোদিত মামলার শুনানিতে কেন্দ্রীয় তদন্ত ব্যুরো সিবিআই আজ নতুন করে স্টেটাস রিপোর্ট জমা দিয়েছে।

সেই রিপোর্ট খতিয়ে দেখে প্রধান বিচারপতি জানিয়েছেন তদন্তে বেশ কিছু গুরুত্বপূর্ণ তথ্য উঠে এসেছে।

পুজোর ছুটির পর মামলার পরবর্তী শুনানিতে আদালত টাস্কফোর্সের কাছ থেকে রিপোর্ট নেবে বলে জানিয়েছে।

২) আর জি কর হাসপাতালে তরুণী চিকিৎসকের ধর্ষণ ও খুনের ঘটনায় ধৃত প্রাক্তন অধ্যক্ষ সন্দীপ ঘোষ এবং টালা থানার প্রাক্তন ওসি অভিজিত মন্ডলকে চৌঠা অক্টোবর পর্যন্ত জেল হেফাজতে পাঠানো হয়েছে।

৩) তৃনমূল ছাত্র পরিষদ নেত্রী রাজন্যা হালদার ও প্রান্তিক চক্রবর্তী আর জি কর ইস্যুতে তৈরি স্বল্প দৈর্ঘ্যের ছবি মুক্তির দিন স্থগিত রেখেছে।

৪) প্রখ্যাত অভিনেতা মিঠুন চক্রবর্তী এবারের ‘দাদাসাহেব ফালকে’ পুরস্কার পাচ্ছেন।

আর জি করের ঘটনায় সুপ্রিম কোর্টে স্বতঃপ্রণোদিত মামলার শুনানিতে কেন্দ্রীয় তদন্ত ব্যুরো সিবিআই আজ নতুন করে স্টেটাস রিপোর্ট জমা দেয়। প্রধান বিচারপতি ডি

ওয়াই চন্দ্রচূড় এবং দুই বিচারপতি জে বি পার্দিওয়ালা ও মনোজ মিশ্রের বেঞ্চ এপর্যন্ত তদন্তের অগ্রগতি নিয়ে দাখিল করা ঐ রিপোর্ট খতিয়ে দেখেন। পরে প্রধান বিচারপতি জানান, সিবিআই-এর তদন্তে বেশ কিছু গুরুত্বপূর্ণ তথ্য উঠে এসেছে। ধর্ষণ, খুন, হাসপাতালে আর্থিক দুর্নীতি – সব কিছু নিয়েই সিবিআই তদন্ত চালাচ্ছে। তাদের যথাযথ সময় দিতে হবে। আদালতে বরিষ্ঠ আইনজীবী মহেশ জেঠমালানি জানান, ঐ তরুণী চিকিৎসকের নাম প্রকাশ্যে নেওয়া সত্ত্বেও কলকাতার প্রাক্তন পুলিশ কমিশনারের বিরুদ্ধে কোনো এফআইআর দায়ের করা হয়নি। এই মামলায় সুপ্রিম কোর্টে বিচারাধীন থাকায় হাইকোর্টে শুনানি হয়নি। হাইকোর্টে এর শুনানি হতে পারবে কিনা, শীর্ষ আদালতের কাছ থেকেই তা জানতে চান তিনি।

শুনানির শুরুতেই আজ নির্যাতিতার পরিবারের আইনজীবী বৃন্দা গ্রোভার জানান, সমাজমাধ্যমে এখনও তরুণী চিকিৎসকের ছবি ঘোরাফেরা করছে। এব্যাপারে নজরদারির জন্য তথ্য প্রযুক্তি মন্ত্রককে নোডাল অফিসার নিয়োগের আবেদন জানান তিনি। আর জি কর কাণ্ড নিয়ে নির্মিত স্বল্প দৈর্ঘ্যের যে ছবি বিতর্কের সৃষ্টি হয়েছে, তা বন্ধ করার জন্য নির্দেশ দিতে বলেন শ্রীমতি গ্রোভার।

সলিসিটর জেনারেল তখন বলেন, এটি রাজ্যের দেখা উচিত। নির্দিষ্ট করে কোথায় পোস্ট হচ্ছে, সেই বিষয়ে পরিবারের তরফে জানানো হলে বিষয়টি খতিয়ে দেখা হবে।

নির্যাতিতা পরিবারের আইনজীবী আবেদন জানান, আর জি কর নিয়ে যে স্বল্প দৈর্ঘ্যের ছবিটি বানানো হয়েছে, তা বন্ধ করার নির্দেশ দেওয়া হোক। প্রধান বিচারপতি সমাজমাধ্যমে নজরদারি চালানোর জন্য তিনি নোডাল অফিসার নিয়োগেরও দাবি জানান।

কারা কারা এই তদন্তের আওতায় রয়েছে, সেই নামের তালিকা জমা দেওয়ার জন্য সিবিআইকে নির্দেশ দেন প্রধান বিচারপতি। রাজ্যের আইনজীবী তখন জানান, ৫ জনকে ইতোমধ্যেই সাসপেন্ড করা হয়েছে। তারা কারা, সেই নামের তালিকাও জানতে চায় শীর্ষ আদালত। সিসিটিভি বসানোর কাজ কতদূর এগিয়েছে, প্রধান বিচারপতি তাও রাজ্যের কাছে জানতে চেয়েছেন। রাজ্যের তরফে ১০ ই অক্টোবরের মধ্যে সেই কাজ শেষ হয়ে যাবে বলে আইনজীবী আশ্বস্ত করেন। ১৫ ই অক্টোবরের মধ্যে ২৮ টি হাসপাতালে শৌচাগার নির্মাণ ও সংস্কারের কাজও সম্পূর্ণ হবে বলে আইনজীবী জানান। প্রধান বিচারপতি ৩১ শে অক্টোবরের মধ্যে সমস্ত কাজ শেষ করার জন্য রাজ্যকে সময়সীমা বেধে দেন।

শুনানির সময় রাজ্যের তরফে জুনিয়ার চিকিৎসকরা শুধুমাত্র জরুরী পরিষেবা দিচ্ছেন, একথা জানানো হলে প্রধান বিচারপতি হাসপাতালের বহির্বিভাগ ও অন্য সমস্ত জরুরী প্রয়োজনীয় পরিষেবার কাজ কেন জুনিয়ার চিকিৎসকরা করছেন না, তা জানতে চান। জুনিয়ার চিকিৎসকদের পক্ষে আইনজীবী ইন্দিরা জয় সিং তা খন্ডন করে বলেন, এই তথ্য ঠিক নয়। প্রয়োজনীয় পরিষেবা দেওয়া হচ্ছে। হাসপাতালে বেড না দেওয়ার জন্য রোগী মৃত্যুর অভিযোগও খারিজ করে দেন চিকিৎসকদের তরফে আইনজীবী করুণা নন্দী।

পুজোর ছুটির পর মামলার পরবর্তী শুনানিতে আদালত টাস্কফোর্সের কাছ থেকে রিপোর্ট নেবে বলে সলিসিটর জেনারেলকে জানান প্রধান বিচারপতি। কিন্তু সেই টাস্কফোর্সে পশ্চিমবঙ্গের কারোর নাম নেই বলেও বিষয়টি আদালতের নজরে এলে কমপক্ষে একজন প্রতিনিধি রাখার অনুরোধ করেন তিনি। ইন্দিরার বক্তব্যের সঙ্গে সহমত হন প্রধান বিচারপতিও।

এদিকে, শীর্ষ আদালতের শুনানির পর আজ নির্যাতিতার বাবা জানিয়েছেন, সুপ্রিম কোর্ট এবং সিবিআই এর উপর তাদের সম্পূর্ণ আস্থা আছে। আদালত তদন্তর উপর নজর রাখছে। দেশের সর্বোচ্চ আদালতের থেকে তারা ন্যায়বিচার পাবেন বলঙ্গি তাদের আশা। তিনি আরো বলেন, তার মেয়ের মৃত্যুর মূল অভিযুক্তরা এখনো স্বাধীনভাবে ঘুরে বেড়াচ্ছে। জুনিয়র চিকিৎসকদের নিরাপত্তায় রাজ্য সরকারের অবিলম্বে যথোপযুক্ত ব্যবস্থা গ্রহণ করা উচিত। সাগর দত্ত হাসপাতালে চিকিৎসকদের উপর হামলার ঘটনা দুঃখজনক বলে উল্লেখ করে তিনি, জুনিয়ার চিকিৎসকরা যদি ফের কর্মবিরতিতে যায়, তার পিছনে আদৌ অন্যায় যুক্তি রয়েছে কিনা তা নিয়ে প্রশ্ন তোলেন।

আর জি কর হাসপাতালে তরুণী চিকিৎসকের ধর্ষণ ও খুনের ঘটনায় ধৃত প্রাক্তন অধ্যক্ষ সন্দীপ ঘোষ এবং টালা থানার প্রাক্তন ওসি অভিজিত মন্ডলেকে চৌঠা অক্টোবর পর্যন্ত জেল হেফাজতে পাঠানো হয়েছে। এদের আজ ভারুয়ালি শিয়ালদা আদালতে তোলা হয়।

এদিকে, এই ধর্ষণ, খুন ও আর্থিক দুর্নীতির মামলায় সন্দীপকে নিজেদের হেফাজতে নিতে চেয়েও আবেদন প্রত্যাহার করে নিয়েছে কেন্দ্রীয় তদন্তকারী সংস্থা। তদন্তে কিছু গুরুত্বপূর্ণ নথি পাওয়া গেছে বলে জানিয়ে সিবিআইয়ের পক্ষ থেকে সন্দীপকে নিজেদের হেফাজতে নেওয়ার আবেদন জমা পড়ে। কিন্তু জেলে গিয়ে জেরা করার সুযোগ থাকা সত্ত্বেও তাকে হেফাজতে কেন চাওয়া হচ্ছে, তা নিয়ে বিচারক প্রশ্ন তোলেন। সন্দীপকে জেলে জিজ্ঞাসাবাদ করার জন্য বিবেচনা করে দেখা হবে আদালত জানালে তারপরই আবেদন প্রত্যাহার করে নেন তদন্তকারী সংস্থার আইনজীবী।

অন্যদিকে, সন্দীপ ঘোষের বেলেঘাটা বাড়ির একাংশ বেআইনীভাবে তৈরি হয়েছে, এই অভিযোগের প্রেক্ষিতে পুরসভার ইঞ্জিনিয়ার ও কর্মীরা আজ সেখানে যান। ছিল পুলিশও। বাড়ির চারপাশও খুঁটিয়ে পরীক্ষা করে দেখে তারা।

তুনমূল ছাত্র পরিষদ নেত্রী রাজন্যা হালদার ও প্রান্তিক চক্রবর্তী আর জি কর ইস্যুতে তৈরি স্বল্প দৈর্ঘ্যের ছবি মুক্তির দিন স্থগিত রেখেছে। এরা আজ তুনমূল ছাত্র পরিষদ সভাপতি তৃনাকুর ভট্টাচার্যকে ই মেইল করে এ কথা জানান। “আগমনী তিলোত্তমাদের গল্প” নামে এই শর্ট ফিল্মটি আগামী দোসরা অক্টোবর মহালয়ার দিন মুক্তি পাওয়ার কথা ছিল। কিন্তু বর্তমান পরিস্থিতিতে, বিষয়টি সংবেদনশীল ও বিচার প্রক্রিয়ায় থাকায় সব কিছু বিচার করে তা স্থগিত রাখার সিদ্ধান্ত নেওয়া হলো বলে জানিয়েছেন তাঁরা।

উল্লেখ্য এই ছবিটি ঘিরে বিতর্ক তৈরি হওয়ায় তুনমূল ছাত্র পরিষদ থেকে প্রান্তিক ও রাজন্যা দুই জনকেই সাসপেন্ড করা হয়।

স্বচ্ছ ভারত মিশন : স্বচ্ছতাই সেবার আওতায় সারা দেশ জুড়ে চলছে পরিচ্ছন্নতা অভিযান। এবছরের মূল ভাবনা স্বভাব স্বচ্ছতা - সংস্কার স্বচ্ছতা। আকাশবাণী সংবাদ প্রযোজিত একটি বিশেষ আলোচনা মানসিকতায় পরিচ্ছন্নতা শুনবেন সোমবার রাত সাড়ে নটায় গীতাঞ্জলি, ১০৭ মেগা হার্টজ এবং DTH বাংলায়। অংশ নিয়েছেন পূর্ব রেল ও কলকাতা মেট্রো রেলের মুখ্য জন্য সংযোগ আধিকারিক কৌশিক মিত্র এবং আয়কর দপ্তর ধানবাদের যুগ্ম কমিশনার দেবশীষ বিশ্বাস। সঞ্চালনায় কল্যাণ লাহা।

রাজ্য সরকার আসন্ন উৎসবের দিনগুলিতেও দক্ষিণবঙ্গের সব জেলা প্রশাসনের শীর্ষ কর্তা, মন্ত্রী সহ এলাকার জনপ্রতিনিধিদের বন্যা দূর্গত এলাকায় ক্ষতিগ্রস্ত মানুষদের পাশে থাকার নির্দেশ দিয়েছে।

বাইট

উত্তরবঙ্গে লাগাতার বৃষ্টির ফলে জল বাড়তে শুরু করেছে মালদা জেলার হরিশ্চন্দ্রপুর ২ নং ব্লকের ফুলাহার সহ বিভিন্ন নদীতে। সামগ্রিক পরিস্থিতি খতিয়ে দেখতে নদী তীরবর্তী গ্রাম গুলি পরিদর্শন করলেন জেলাশাসক নীতিন সিংহানিয়া।

মালদার ভুতনিতে বন্যা পরিস্থিতি উদ্বেগজনক আকার নিয়েছে। বন্যার জলে টিনের নৌকা ডুবে এক ব্যক্তির মৃত্যু হয়েছে। জানা গেছে, পুলিনটোলা এলাকায় আজ জিতেন মন্ডল নামে বছর ৩০ এর এক ব্যক্তি দুই নাবালিকা সন্তানকে টিনের নৌকায় বসিয়ে প্লাবিত এলাকা হয়ে দোকান যাচ্ছিলেন। সে সময় নৌকাটি হঠাত উল্টে যায়।

রাজ্যের সাম্প্রতিক বন্যা পরিস্থিতি নিয়ে মুখ্যমন্ত্রী মমতা ব্যানার্জি আজ নবান্ন থেকে দক্ষিণবঙ্গের সব জেলার জেলাশাসক, পুলিশ সুপার, পুলিশ কমিশনার সহ ডিজিপি, মুখ্য সচিব এর সঙ্গে পর্যালোচনা বৈঠক করেন। পরে মুখ্য সচিব মনোজ পঙ্ক সাংবাদিকদের বলেন, উৎসবের দিনগুলিতে বন্যা দুর্গতদের কাছে দ্রুত ত্রাণ পৌঁছে দেওয়ার জন্যে মুখ্যমন্ত্রী সব জেলা প্রশাসনকে নির্দেশ দিয়েছেন। পাশাপাশি আগামী বুধ এবং বৃহস্পতিবার যে ভরা কোটাল রয়েছে তার জন্য সবাইকে সতর্ক থাকতে বলেন তিনি। প্রয়োজনে বিপদজনক এলাকায় থাকা মানুষজনকে নিরাপদ স্থানে সরিয়ে নিয়ে আসার কথা বলা হয়েছে। মুখ্যসচিব জানান, উত্তর এবং দক্ষিণবঙ্গে বন্যা এবং ভূমিধসে কতটা ক্ষয়ক্ষতি হয়েছে সেটা খতিয়ে দেখার জন্য সমীক্ষার কাজ শুরু হয়েছে।

পশ্চিম মেদিনীপুরের ঘাটালের দু নম্বর ওয়ার্ডের বন্যার জলে তলিয়ে গিয়ে বছর ছয়েকের এক শিশুর মৃত্যু হয়েছে। রহিত রুইদাস নামে ঐ শিশুটি পরিবারে অন্যদের সঙ্গে তার দাদুর শ্রদ্ধের কাজ করতে গিয়েছিল। সেই সময় হঠাতই সে জলে পড়ে

তলিয়ে যায়। স্থানীয়রা জাতীয় বিপর্যয় মোকাবিলা বাহিনীর সাহায্যে তল্লাশি চালায়। ঘন্টা দেড়েক পর উদ্ধার হয় শিশুটির মৃতদেহ।

এদিকে, শান্তিনিকেতন থানার বনডাঙ্গা ক্যান্ডলে স্নান করতে নেমে নবম শ্রেণীর এক ছাত্রও আজ তলিয়ে গেছে। মিলন দাস নামে পারুল ডাঙ্গা উচ্চ বিদ্যালয়ের ঐ ছাত্রটি দুপুরে কয়েকজন বন্ধুর সঙ্গে স্নান করতে নামে। তারপর দুজন আচমকা তলিয়ে যায়। একজনকে উদ্ধার করা গেলেও মিলনের এখনও খোঁজ মেলেনি। স্পীড বোট নামিয়ে ডুবুরির সাহায্যে তাঁর খোঁজে তল্লাশি চালানো হচ্ছে।

প্রখ্যাত অভিনেতা মিঠুন চক্রবর্তী এবারের ‘দাদাসাহেব ফালকে’ পুরস্কার পাচ্ছেন। আগামী মাসে ৭০-তম জাতীয় চলচ্চিত্র পুরস্কার উৎসবে তাঁর হাতে এই সম্মান তুলে দেওয়া হবে। একটি প্রতিবেদন

ভয়েসকাস্ট
